

Inuusuttunut 16-it 30-llu akornanni ukiulinnut ”Nuna Job” paarlaaseqatigiinnermik Nunavummi Nunavimmilu akisussaaffeqarlutik oqartussaasut suleqatigalugit Naalakkersuisut pilersitsinissaat pillugu Inatsisartut aalajangiussassaannut siunnersuut.
(Inatsisartut ilaasortat Jane Petersen aamma Juliane Henningsen, Inuit Ataqtigiit)

Akissutitut allakkiaq

(Inuussutissarsiornermut Suliffeqarnermullu Naalakkersuisoq)

Siullermeenera

Issittumi immikkoortuni allani, Nunavummi Nunavimmilu inuusuttut 16-it 30-llu akornanni ukiullit qanoq paarlaaseqatigiillutik najugaqarsinnaaneri pillugit siunnersuuteqartuusut siunnersuutigisaat soqutiginaartuuvoq.

Siunnersuut ukiorpassuarni Kalaallit Nunaata peqataaffigisaanik Nord-jobb-mik aaqqissuussinnermit isumassarsiaavoq. Ukiorpassuarni kalaallit inuusuttut nunat avannarliit ilaanni pissarsiffiusumik najugaqartarsimapput, inuusuttoqatitillu nunat avannarlerneersut ilisarimasalersarlugit. Nord-jobb arlalippassuarnut inuunermi ataavartussamik sunnuteqartarsimavoq.

Nord-jobb naatumik oqaluttuarissagaanni tassaavoq Nunat Avannarlerni inuusuttut-namminersortoqarfinneersut ilanngullugit – piffissami sivikinnerusumi nunaminni paarlaaseqatigiillutik sulisinnaanerat, taamaalillutik kulturinut/inooriaatsinullu allanut naleqarluartumik paasinnissinnaalerlutik.

”Nuna Job”-mik pilersitsinissamik siunnersuuteqartut siunertarisaat Naalakkersuisut taperserpaat. Siunnersuuteqartut saqqummiinerattut tamanna inuusuttunut isumaqassaaq issittumi misilittakkanut assissaqanngitsunut arlalissuarnut, inuunermi kingusinnerusukkut iluaqutigisinnaasaannut attaveqalernissamut, minnerunngitsumillu ingerlaqqilluni ilinniaqqinnissamut misilittagaqalernermik.

Siunnersuutip Inatsisartunit akuerineqarluni atuutilersinneqarsinnaanera sioqqullugu, misissuinerit arlaqartut pisariaqarput. Tamatumani Naalakkersuisut ilaatigut eqqarsaatigaat;- ukioqqortussutisimut killissarititaasut, aningaasaqarnek/aningaasaliineq aamma aaqqissuussinnermut aqutsisoqarfik. Pingaaruteqarportaaq paasissallugit toqqaannartumik aqquteqarnerseq, kiisalu oqaatsitigut inuusuttunit suliffeqarfinnillu piginnaasarineqatut pillugit paasisaqassallutik.

Taamaattumik Nuna-Job-mik aaqqissuussamut aallarnisaaniarluni periarfissanik Naalakkersuisut misissuisitsillutik nalunaarusiortitsissapput. Misissuinerullu inerneriumaagassai suli ilisimaneqanngimmata Naalakkersuisut siunnersuut taamatut isikkoqartillugu akuersaangilaat tapersersornartuutilluguli.

